

UNIVERZALNA DECIMALNA KLASIFIKACIJA

priručnik / Tatjana Kovač ... [et al.]. Ljubljana : Narodna i univerzitetna knjižnica, 2006. 130 str. 24 cm ISBN 961-6551-11-6



UNIVERSAL DECIMAL CLASIFICATION

handbook /Tatjana Kovač... [et al.]. Ljubljana : National and University Library, 2006. 130 p. 24 cm

Nevenka Hajdarović

NUBBiH / NULBH, Sarajevo

Centar za ISBN i ISMN

Center for ISBN and ISMN

nevenkah@nub.ba

Poslije opsežnog izdanja priručnika za UDK autorice I. C. McIlwaine, pod naslovom ***The UDC : a guide to its use***, koji se pojavio 2000. godine, učestala su nova izdanja priručnika za upotrebu UDK na raznim jezicima.

Tako je grupa slovenačkih bibliotekara (Tatjana Kovač, Aljoša Pelhan, Špela Razpotnik, Darija Rozman, Mojca Rupar Korošec, Metka Sternad i Darko Vrhovšek), svi sa bogatim iskustvom u sadržajnoj obradi građe, sačinila svoj priručnik za upotrebu Univerzalne decimalne klasifikacije (UDK). Priručnik je namijenjen prije svega početnicima u klasifikaciji, ali će pomoći i svima ostalim, jer velika većina slovenačkih biblioteka koristi upravo UDK za sadržajnu obradu i smještaj građe.

Kako se navodi u uvodu, posljednje prethodno izdanje UDK tablica na slovenačkom jeziku je iz 1991. godine, što znači da se itekako osjećala potreba za ovom publikacijom. Trebalo je, prije svega, pokriti brojne izmjene koje su se u međuvremenu dogodile u UDK.

Dakle, priručnik je obuhvatio sve novine u UDK koje su se dogodile do 2002. godine, a to je važno istaći jer se izmjene i dopune koje su se dogodile u periodu 1992-2002. smatraju revolucionarnim. Ukratko, došlo je do promjene kompletnog šifarnika grupe 2 (religija) i grupe 8 (lingvistika i književnost), a djelomično šifarnika grupe 9 (geografija i historija) i grupe 0 (nauka i znanje uopće). Naravno, odraz je to promjena u stvarnom svijetu, kakve su, recimo, one u geopolitici evropskih država ili one izazvane eksplozivnim razvojem informatike i komunikacionih tehnologija.

U kraćem uvodu autori su se osvrnuli na osnivače UDK, prva izdanja i ulogu UDK konzorcija – tijela koje brine o razvoju i primjeni ovog sistema, te podsjetili na postojeću stručnu literaturu na slovenačkom jeziku.

Glavni sadržaj priručnik je podijeljen na dva dijela. U prvom dijelu, koji nosi naslov Splošno o UDK in opis privesnih vrstilcev (Općenito o UDK i opis pomoćnih brojeva), dati su pregled, osnovne karakteristike i struktura pomoćnih brojeva, sa karakterističnim primjerima uz navođenje određenih kombinacija brojeva.

Pregled glavnih tablica UDK dat je u poglavlju Opis skupin glavnih vrstilcev. Uz svaki glavni broj naveden je i procenat koji taj glavni broj zauzima u UDK tablicama (0 – 3,3%, 1 – 1,5%, 2 – 4%, 3 – 12,8%, 5 – 20,7%, 6 – 51%, 7 – 4,7%, 8 – 1,2%, 9 – 0,5%). Slijedi kraći izvod iz svake skupine, nakon čega je dat manji broj karakterističnih primjera iz slovenačkog uzajamnog kataloga (COBIB). Posebna pažnja posvećena je upotrebi UDK u mrežnom okruženju. UDK je dobra zamjena za tezauruse i pretraživanje po ključnim riječima. Također, važno je istaći da je omogućeno pretraživanje po broju i da se na taj način izbjegavaju jezička ograničenja.

Priručnik je veoma dobro strukturiran i grafički opremljen, što omogućava lako snalaženje. Objašnjenja koja su data uz glavne skupine i podskupine su veoma jasna. Primjeri koji su navedeni su veoma karakteristični i mogu poslužiti svima koji se upoznaju sa sistemom UDK i onima koji treba da riješe neke svoje dileme.

